



Komunikadu Imprensa
Tribunál Distritál Dili
07 Juñu 2019

**Tribunál refere arguidu inamputavel tanba anomalia psíkika ba prizaun:
JSMP husu Governu tenke hari'i fasilidade própriu ba arguidu sofre
anomalia psíkika sira**

JSMP observa katak iha fulan ida-rua ikus ne'e Tribunál Distritál Dili kontinua refere arguidu sira ne'ebé sofre inkapasidade tanba anomalia psíkika ba prizaun. Tuir lei arguidu sira ho típiku hanesan ne'e tenke eskluidu hosi responsabilidade kriminál tanba konsidera inimputavel.

Iha 07 Abril 2019, Tribunál Distritál Dili prezide julgamentu leitura akordaun ba krime omisídiu agravadu ne'ebé envolve arguidu NF hasoru nia oan no feen, iha Distritu Likisá. Tribunál prova katak arguidu sofre moras mental¹ bainhira komete krime ne'e maibé tribunál kontinua refere arguidu ba prizaun durante tinan tolu. Tribunál decide haruka arguidu fila-fali ba prizaun ho razaun katak atu asegura arguidu hetan tratamentu médiku to'o nia bele rekupera fali hosi nia moras ne'e.

Antes ne'e iha 12 Feveiru 2019, Tribunál Distritál Dili mós halo desizaun hanesan ba arguidu PE ba krime ofensa ba integridade fízika simples ho natureza violénsia doméstika no kondena arguidu ho pena efetiva tinan 1 prizaun².

“Desizaun ba kazu rua ne'e potencialmente viola regra no prinsípiu jéral hosi direitu penál partikularmente kona-ba esesaun ba responsabilidade kriminál ba ema hirak ne'ebé sofre moras mentál iha tempu ne'ebé nia komete krime ne'e,” dehan Diretór Ezekutivu JSMP, Luis de Oliveira Sampaio.

Artigu 21 (1) no (2) Kódigu Penál *kona-ba inimputabilidade tanba anomalia psíkika define katak:*

(1) Sei konsidera inimputavel ema ne'ebé, tanba anomalia psíkika, iha momentu ne'ebé nia pratika faktu labele avalia faktu ne'e nia ilisitude ka hola desizaun tuir avaliasaun ne'e.

2. Bele hetan deklarasaun hanesan inimputavel ema ne'ebé, tanba anomalia psíkika, iha momentu ne'ebé nia pratika faktu, iha kapasidade atu avalia faktu ne'e nia ilisitude ka atu hola desizaun tuir avaliasaun ne'e diminuida sensivelmente.

¹Bazeia ba lezada nia deklarasaun no relatóriu médiku hosi Dr. especialista ba moras mentál

² Ba informasaun detallu bele akompaña Sumáriu Kazu Tribunál Distritál Dili fulan-Feveiru 2019 iha website jsmp.tl

JSMP kumpriende katak atualmente la iha facilidade ida-ne'ebé própriu ba ema moras mental sira maibé prizaun mós la'os fatin ne'ebé merese/apropriadu ba ema moras mental sira atu hela hodi halo tratamentu ba sira nia saúde.

JSMP fiar katak iha sirkunstánsia sira hanesan ne'e, partikularmente tanba defaktu buat barak sei falta, rezulta hatuur juis sira iha opsaun ne'ebé difisil atu halo desizaun ne'ebé reflète nesesidade husi kazu ida-idak. Maibé ida-ne'e la signifika permite juis sira atu halo desizaun ne'ebé latuir lei. Mezmu iha desizaun juis nian konsidera katak haruka arguidu sira ba prizaun hodi halo tratamentu to'o arguidu sira rekupera fali, maibé previzaun durasaun tempu tinan tolu ka tinan ida konstitui impresau (*mengesankan*) katak arguidu hetan kondenasau, la'os medida tratamentu. Saida mak nu'udar sasukat ba juis sira atu halo previzaun katak tinan ida ka tinan tolu arguidu sira bele rekupera fali ona hosi ninia moras ne'e. Literalmente prizaun fatin ba kastigu ba kondenu sira la'os fatin ba tratamentu ba ema moras.

JSMP entende katak tribunál decide hodi refere ka haruka arguidu ba iha prizaun tanba konsidera katak arguidu iha tendénsia bele hamosu fali risku seluk bainhira husik fila ba sociedade. Maibé, JSMP konsidera katak prizaun la'os fatin ne'ebé nessesariu ba arguidu tanba arguidu nia kondisaun presiza fatin ne'ebé apropiadu, hakmatek, amigavel no asesivel tuir ninia natureza. Aleinde ne'e fatin ne'ebé bele permite família sira livremente ba vizita no profesionál saúde sira bele regularmente ba halo tratamentu no akonsellamentu atu ajuda arguidu bele rekupera lalais.

JSMP konsidera katak situasaun ida-ne'e akontese tanba ministériu relevante sira hanesan Ministériu Saúde no Ministériu Solidaridade Sosiál falla atu identifika nesesidade ba kazu sira spesífiku sira hanesan ne'e. To'o agora governu seidauk kria klinika no facilidade própriu ba pasiente moras mental sira liuliu ba sira ne'ebé ho kondisaun grave. Mezmu oras ne'e dadaun iha ona doutór especialista ba pasiente moras mental maibé ida-ne'e la'os ba pasiente hirak ne'ebé ho kondisaun grave. Ezemplu konkreta maka ema moras mental barak maka agora dadaun sei kontinua la'o iha públiku, ne'ebé posivelmente fó risku no ameasa seguransa ema nian iha sociedade.

Iha kazu sira ho sirkunstánsia spesífiku hanesan ne'e, bainhira juis atu halo desizaun, presiza rona opiniaun no konsulta ho profesionál saúde no ofisiál sira hosi ministériu solidaridade sosiál atu buka opsaun kolektivu tuir nesesidade kazu ida-idak. Tribunál nesesariamente evita halo previzaun ka interpretasaun ba situasaun sira ne'ebé fora hosi sira nia méritu profesionál.

JSMP rekomenda ba governu atu estabelese facilidade spesífiku no própriu ba kazu sira hanesan ne'e atu evita hatuur juis iha situasaun ne'ebé dilematiku.

Atu hetan informasaun liután, favór kontaktu:

Luis de Oliveira Sampaio
Diretór Ezekutivu JSMP
Diresau e-mail: luis@jsmp.tl
Website: <http://jsmp.tl/>